

太極圖說-周敦頤

無極而太極 太極動而生陽 動極而靜 靜而生陰 靜極復動

一動一靜 互爲其根 分陰分陽 兩儀立焉

陽變陰合 而生水火木金土 五氣順布 四時行焉

五行一陰陽也 陰陽一太極也 太極 本無極也

五行之生也 各一其性

無極之眞 二五之精 妙合而凝 乾道成男 坤道成女 二氣交感 化生萬物 萬物生

生而變化無窮焉

惟人也得其秀而最靈 形既生矣 神發知矣

五性動而善惡分 萬事出矣

聖人定之以中正仁義 而主靜立人極焉

故聖人與天地合其德 日月合其明 四時合其序 鬼神合其吉凶

君子修之吉 小人悖之凶

故曰立天道 曰陰與陽 立地之道 曰柔與剛 立人之道 曰仁與義 又曰原始反終

故知死生之說 大哉易也 斯其至矣